





丙寅集序

我友穎儒先生筆挾風飛較八叉而更速才爲天縱滿
一石以何難已於終賈之年卽有班楊之譽曾逢薛燭
輒號龍泉每遇孫陽先知驥子疊秋山而作骨百丈空
青瀝春水以爲神一江嫩綠篇章旣富蹊徑尤新使將
風騷是詩家之程尉俾調律呂誠菡苑之師涓故其息
廬伊想諸集久矣鼓吹于詞場而膾炙于海內矣歲在
攝提時方讀禮王褒奉諱詩廢蓼莪庾信傷心賦成枯
樹偶游江上只爲饑驅載過蕪城非因攬勝斯時也蒲
帆乍卸遄迎元禮之舟縞帶爭遺頓闢公超之市珠簾

高控何處簫聲蠟屐新來誰家歌舫日與同學諸君子
互商風雅迭奏莖韶酒傾翡翠之樽句剪鴛鴦之綺紅
箋試研則玉樹成叢斑管徐揮而瓊花破萼乃屬蛟門
汪先生細加評騭竚付副削不意歸途適遭水厄千雙
白璧深藏龍女之宮萬斛明珠徧散鮫人之室爰于破
筵零統之上紙屏畫笥之間網羅放失厯獲二三今所
授梓者是也嗟乎鄭商人之玉環一枚自足寶矣石季
倫之珊瑚幾樹不在多焉然諸體皆優無奇不具語其
峭拔則瘦嶺攢霄指厥菁華則晴霞夾月磅礴離奇之
氣軒昂磊落之姿鸞鳳互飛波濤怒立不洗刷而焰非

烹鍊而工上之出入三唐下之驅馳兩宋乃知五柳先
生之後裔誠三吳才子之前茅今者斜披白袷將過齊
魯之郊小勒烏騾欲訪荆高之蹟故人握手舊雨談心
旣當酒酣耳熱之時必多石破天驚之作茲以丙寅名
是集者蓋不欲多洩造化之秘藏以干鬼神之畏忌豈
特詩人舊宅曾鄰丁卯之橋隱士間居寔惟子午之谷
而已哉同學弟徐覽序

丙寅集

感興擬朱子 選三首

五茸陶爾穉穎儒

大造無停機寒暑更代謝惟人生其中類印見元化跂
彼神聖姿曾不自閑暇日躋爰興商惜陰乃造夏如何
悠悠者選輓甘庸下孝悌本性能仁義非外假六經發
幽光燭苞啣不夜升高必自卑至味等噉蔗廓然見本
原詩書亦傳舍安用標名目紛紛互彈射

庖犧作八卦奇偶開一畫何嘗綴文字物理自昭晰姬
孔諸聖人演之成大易妙義揭日月憑象供紬繹草元

彼何人奇字漫攜撫儼然僭稱經聖言被剽賊雕蟲何
足云百世待相識辟猶御織縞觀者何烜赫一朝秋風
淒却令思布帛冥心悟原始無極而太極
東遷王教衰異端入排闥孔孟生其間一柱中流截力
能窮鼠技勢難補螳穴荏苒百餘年猖狂掉簧舌申韓
尚刻深老莊崇曠達習俗遞滲淫橫流不可遏祖菟旣
已亡典午忽焉沒後儒覩前鑒衆喙紛批抹當時取富
貴非此號迂拙爲學無干時聖道豈中絕

元日

爲嫌增馬齒羞見曆頭新何處喧金鼓催人鬢髮銀癡

兒啼笑雜俗客往來頻獨擁紅罽坐焚香懺宿因
閨歲春遲至西風臘未殘卷簾日影薄繞樹鵲聲乾十
指未消凍九泉應更寒白雲凝望遠慟哭倚靈棺
客問歸何自言從避債臺門庭此斲寂車馬不須來詩
卷縈蛛網琴床冷碧苔猛然聞剝啄環柱起驚猜
伏枕思前事蹉跎蝶夢中因人長碌碌就計每匆匆身
世粘泥絮親朋落葉風重將新涕淚一灑向途窮

上湯大中丞

扶輿敞清淑萬里騫鵬味風雲乘逞來滄海渺經觀一
枝斲刷羽五采驚分繡我公杞梓材明堂森結構寸穎

挽千鈞虎跡失乾寶乘鉞蒞吳天利病勞詰究殷殷夜
聞雷藹藹春舍耐魚鳥荷竝生獬豸駮互走宵緘無停
機晨春有餘糅指顧舊俗移絃歌叶廉肉詩書藉膏腴
禮義佐耨耨辟彼萬石鐘小大惟所扣下走不自量負
劍輒左右戴德蚤背山心版銘篆籀作歌誦南山挂一
恐萬漏

江上寄家誕先

吾家本越產禹穴標名族遘亂走四方蒼黃不擇鹿天
運異苑枯世情變寒燠對面不得親何況阻山谷南邨
我故居輟耕存敝簾累葉事鉛槧名場競縮朒先子籍

門望勝衣入華屋名卿甘結襪上相願推轂

懷宗季年
穀城奏薦

先子有北溟方刷羽時數丁百六悠悠澧水蘭采采東

籬菊蒲輪賁嘉招一瓢矢適軸

戊午鴻博之召葉文敏
公欲以先子上達啓事

力辭趨庭凜明訓遺經不足讀鯁生生恂恂惜不分麥

菽結願歸田廬鐵筴騎黃犢中間墮塵網儒冠等猴沐

俊及誤姓名車馬悔往復夜泣王章衣朝啖陽城粥詩

書難御窮逝將返初服所嗟門祚衰嚙噬攢蛇虺昨鼓

江上棹難弟枉片牘八州事業荒握手勉式穀鳩盤匹

間媿鶉結依霧縠相見一以喜顧影轉皇慙豈無同心

人十年歌伐木何如江與漢發源共星宿寄語竹林游

毋使阮家獨

陸雲士使君招同朱玉汝惠沛蒼趙惠霑姜萬青

張弘蘧吳元朗諸子觀劇卽席賦

輕寒冉冉覆煙蘿金谷開尊互卷波花影亂飄疑學舞

鶯聲怯囀爲聞歌雨深石髮春光少月墮檐牙夜色多

擬向柳邊尋好夢兩行紅袖照顏酡

是夕演牡丹亭

東南謠呈學使李公

東南才地纍錯奕浪數三吳作巨擘桂嶺非無塞路榛

藍田詎少龕頑石家家壇坫樹聲華北部南衙交盾戟

彳亍年年只噉名短長誰爲量玉尺先是使者持節來

山左巨公最烜赫

謂琅琊劉公德州田公萊陽趙公

徧張鐵網購珊瑚

巧製羅裳嫁婉孌一字真同斧袞懸千金未抵春秋直

奇文兩句滿人間明月清風自蕭索是時遷秩由郎官

背吭往往遭拊搯大吏朱書署姓名貴人寸楮投紛籍

徘徊四顧喚奈何掩卷低眉三太息帝謂司衡宜重

臣臨軒申命鳳池客公拜稽首上星軺一瞻丰采爭辟

易三劉已向白門尋二陸還從吳下得月寒金鑲夜厭

厭霜肅牙旗秋寂寂地密何緣寄雁魚神清只愛餐冰

蘖坐看明鏡淨塵氛直使在瀾失瀟澹蠹車怒馬誰家

兒自棄深山誰復惜賤子名場妄自尊萬卷圖書丁不

識屠菟漫費十年心刻楮空憐三載力寧能挾瑟向齊
廷已分毀容老漆室所嗟知己恩未酬夜雨孤燈淚霑
臆纏綿自切秉彝好底須身被方爲德微才此日虛品
題長劔他年異拂拭公兩試三吳遜以
讀禮俱未及與

陽城晚步次沛蒼韻

春色濃于酒黃鸝喚不醒亂花迎綬紫芳草妬袍青落
日鳥爭樹水深魚唼萍悠然觀物化道念自沈冥

送劉允恭歸虞山

中酒厭厭病不支河梁况復送君時一帆無計留風伯
三疊何心聽雪兒大婦定應占鵲信小牕猶未負花期

自憐松菊荒行盡難把歸程問梅師

擬古

好鳥當春鳴好女當春愁日長倦刺繡盈盈上高樓誰
家白面郎銀鞍跨紫驢垂鞭不忍去欲行送雙眸感君
綢繆意通詞乏蹇修守貞良獨難自媒亦足羞羨彼東
家女蓬鬢風颺颺明月照織室咿軋聲不休花枝任開
落豈復知春秋十年終不字曾傷標梅不

春感奉寄宮允先生

草土餘生萬慮空誰教曳尾出泥中依人刺學禰生漫
回騎途同阮籍窮野岸垂楊籠曉日畫簾乳燕語春風

那知桃李繽紛日獨有幽蘭泣露叢

留別沛蒼三十韻

別酒不須斟一言叙夙心風雲君踔厲直削我侵尋俗
漫分車笠情偏合芥鍼久要期皓首古道賤黃金憶昨
登堂日相看墮淚深忘形蠲禮法密意對蕭森抵掌評
人物掀髯論古今半牕鐙影暗五夜漏聲沈高舉摩黃
鵠冥揆侶白蟬斷章推競病落簡辨陶陰偶作齧牙體
時爲擁鼻吟抑揚聯徵角追琢必瓊琳味洽伊公鼎光
分天女紅風流誇衛杜繁豔閨江任角勝翻碁勢攜尊
聽鳥音狂呼因奪采僵卧爲愁霖歆側山公帽蒼涼中

散琴晴光欣盎盎游騎竝駸駸挾彈斜陽岸垂竿淥水
潯看花同得句對月獨沾襟避俗紆歸路探幽愛晚岑
有時乘彩鷁隨意寫來禽風暖桃花扇香生璫瑁簪綺
羅春濼濼絲筦晝愔愔恍似游芝館何須羨竹林舊歡
疑夢寐後會杳商參雲樹空翹結江湖歎滯淫雙魚煩
數寄三徑遲遙臨愁緒紛難理離腸晚不禁殷勤持贈
意早夜佩良箴

鏡臣宅見壁間舊題

暗塵殘墨故依依省得揮毫倚醉時老大情懷今昨變
不堪重對去年詩

題柳陰士女讀書圖爲陸錫山

赤闌橋外柳如絲
撩得春心不自持
生小多愁緣識字
從今莫咏玉臺詩

扶風講堂歌爲郡守魯公

苧城大道樓閣雄
講堂百尺凌雲中
青螺九點排闥入
環以谷水聲琤琮
金簡來自會稽穴
秘書親受明光宮
開械恍憶西清曉
賜袍耀餅綾花紅
一麾詎足展所學
帝念民力東南窮
昔年縣未嗟絲穀
今也耕鑿游春風
談忠說孝習俗改
蚩蚩不識誰之功
訟堂無事吏早散
飛鵲馴野花當空
一編冥摻入窳窳
勗爾多士偕磨礪

礪賤子早年耽著述
古研穿鐵煙消凶
負劍何緣親絳幄
側耳寒谷吹鄒篥
刻石尚隘東西峴
作歌願擬大小馮
一杯以當南山祝
起舞不覺頭矇矓

病起記事

病中却悔病前錯
病起還思病中樂
病中生死兩相忘
病起窮愁攪懷惡
古云遣病先遣愁
速喚兒童買上若
心怯沾唇未一盃
屋角倒立天欲落
家人震悼策無出
便請巫師熬龜殼
巫師得兆云莫悲
此是西方神播雲
明當潔齊入廟門
烹羔執兕薦脾臄
庶邀神惠或少痊
不爾倉公亦難藥
忽然酒醒繞牀行
眴眼大叫巫師驚

丙寅集
將之廣陵與莊社如別

我泛廣陵橈君策黃山杖別離從茲始盡此盃中釀伊
昔二三子稔情互激宕縱橫翰墨林虎眎絕輩行漆室
悞紅顏灞陵辱飛將蹉跎華髮生荏苒雄心葬中間矧
多故存歿足悽愴姜郎走京師敬直惠子返江上沛蒼
朱生既奄逝拓園傅生復抱恙駕飛惟我與金生漢威
與君形影傍可憐饑來驅風塵復漫浪雖無兒女情那
能不悒快自古名場地操戈衆所向波瀾返覆間往事
堪懲劓努力愛寸陰年華不再壯

崑山張闇成招同王素岡編修葛葵舒孝廉葉廷

玉文學北園燕集

毒暑薰人醉當盃亦鮮懼湖亭此慙憇酒戶頓教寬櫺
葉先秋墜松風入夏寒虛檐聊散步斜月曬銀灘

舟中苦熱

赤日啣高燭顏雲聳亂峯癡蠅麾不去少女寂無蹤百
體爬梳俛六時飲噉慵篷窻眠未穩奈此荷耨農

渡江

去年渡江當秋夕燈火淒迷亂月色今年渡江乘曉霽
朝暎射影金破碎布颿十幅風力輕波紋不動掌面平
遠岸昨惜綠樹過船頭早有青峰迎水光天光何處辨

漁歌櫂歌雜亂鳴千山無端送急雨蒼黃萬象歸宵冥
似聞吳蠶朝食葉又疑漢馬宵歸營涼颼颼輕容薄
肌粟凜冽六月生四顧茫茫蒸黑霧懷人無那佳期悞
離懷猶自選焦山榜人已報臨瓜步

時李大邨讀書
焦山擬訪不果

平山堂

蜀岡一帶枕城隈古寺憑闌客抱開夾岸柳陰浮綠上
隔江山色送青來西風禾黍凝暉殿落日麈尾射弩臺
爭似昔賢題咏處冷泉殘碣暮鐘哀

觀音閣

煬帝迷樓何處是露苔煙柳暗僧窻傳燈不藉螢爲火

剪綵還留繡作幢細雨泉甘烹第五夕陽亭古醉無雙
游人那解興亡事貪看沙鷗浴暮江

法海寺

石徑蒼涼雁齒平小橋流水對人清寺前柳色關興廢
檻外荷香管送迎夾路笙簫停畫舫出林鐘磬報新晴
繁華轉眴都陳迹端合披緇度此生

天寧寺

此地曾傳柳毅宅何年捨作梵王宮繞城車馬深春雨
滿徑松篁落葉風鳥鵲自馴齋閣畔菟蛇爭舞墨池中

經堂有
書蕭閑扁額

御老僧對客談霏屑殿角驚看夕照紅

自題南邨讀書小照

莫恠今人笑汝癡百城高擁欲何爲算來合向南邨老
雨笠煙蓑雅稱伊

題李松嵐黃山圖冊子

松嵐示我黃山詩銅鈹渾沌鑿濶罅竊疑言詩非此詩
馬角龜毛不厭詐無何示我黃山圖山巖凹凸山泉瀉
詩工含咀得味遲圖成觸目窮造化一詩一圖展轉翫
中邊甘美倒食蔗是時炎景欲爍金當風交筴汗滴醉
披圖斗室生清涼朔雪嫌霜飛九夏諸峯錯落獻好醜
短屐分明歷高下或莊或諧或號怒或抗或墜或斜亞

或疑蹲踞或離立或逞妖冶或蘊藉或相背負如仇讐
或相親比如姻婭或如倚角攘臂爭或如拱揖免冠謝
冥搜萬象在心目意象經營有餘暇我聞黃山二十有
二峯虛無窳窳仙靈舍俗子捫蘿試登陟猛虎攫搏吁
可怕濟勝輸君筆力强天幻神奇入圖畫平生愛山買
無錢探幽願策千里駕藻績無能唵嚙澀面目恐被山
靈咤快哉得此足卧遊昨朝悔辦雙不借

浮山石同黎于一李喈文賦

禹廟西偏一拳石洪荒曾覩平成績海田歛忽陵谷非
摩抄峯頂土花蝕支離已乏補天功曩肩猶多鎮地力

內實集
料得傷心夏鼎遷縱現前身無氣色不如埋沒古祠旁
夜共百靈朝玉帛縮伏疑防秦政鞭深藏巧造方平
精衛填海詎能啣將軍彎弧不敢射得毋攀躋厭俗子
寧向泥沙甘退匿不然此中有良璧早知泣血無人識
扣銅欵梓總不言此是山中真隱逸

司徒廟題壁

南人尚鬼爲鬼愚歲時賽祀兒童趨惚慌何處窮姓氏
山魃木魃憑睢盱我從平山西逸邈驀見古廟森交衢
雕甍刻桷闢瑰兩牽牲噉榼喧群巫心知淫祠不足道
荒碑殘蘚聊捫摸讀罷叫覺肌生粟英風烈烈廉頑夫

整肅儀容上階拜始悔向者言何迂司徒長君姓茅氏
其次許祝與蔣吳五人異姓作兄弟仗俠願得生死俱
溪旁老嫗事若母母也不幸飽虎貙五人啣哀徒手搏
至今此邦無虎虞生前寂寂老政獵千秋俎豆何爲乎
紹定年間李全亂禱神不畏明神誅一怒絳衣持大斧
新塘賊衆旋爲俘寶祐賜額曰英顯褒功崇德王爵殊
定知明神執謙退依然棹楔顏司徒我瞻衣冠三太息
神人感應理豈誣溪毛明水不足薦敬次往事當吳歛

官允先生招同李書雲給諫吳園次太守錢璞崖
司理汪蛟門比部葛稼孫上舍鄭素濤黎于一兩

文學游張善長民部西園燕集卽事 選二首

北墅投閒日東山高卧時掩關方續史著屐偶探奇柳
岸風來細蘭橈客泛遲前林凝望好依約習家池
到此翻驚訝遲回信步難偃松晴作浪曲渚畫生寒花
氣縈衣濕蟬聲怨葉殘師門寬禮數科跣任盤桓
不信樊山遠寒溪咫尺間坐臨王笏席綵繫雀菟環水
面笙歌沸樽前笑語閒高岑斜漏景返照入酡顏

贈歌者

渚蓮落盡柳毵毵別緒羈情兩不堪莫向尊前歌白苧
昨宵歸夢在江南

和王西齋卽次四首

未章兼柬
李詞臣

爲厭風塵色從甘卧草廬因君作客好不復賦間居藥
茗逢人乞窮愁得酒舒桐陰日影薄欹案晝攤書

蕭館秋先到羈人興轉多貪看雲作雨細數葉辭柯依
客攜琴至詩僧載酒過祇嫌來俗駕高枕託微疴

我亦饑驅者艱難仗主人不知歸夢遠乍喜擇交新僻
徑容相訪離懷得重陳蟄蟲鳴應候敢道和陽春

憶別新亭路悲歌白髮增江湖千里夢風雨十年燈高
髻時相尚低眉我未能一枝欣有托繾綣敘交朋

爲史蕉飲悼亡

西廡集
滿院東風送落花杜鵑聲裏月初斜銀河迢遞佳期杳
玉珮闌珊後會賒松墮長釵當枕簾蟬歆薄鬢映窓紗
關情日日登樓望錯向城南認鈿車

掌中嬌小最憐渠螺黛慵描翠管疎已悟縞衣原夢寐
悔教羅襪下清虛芙蓉苑縱斧心難死楊柳經霜眉未舒
珍重夜深垂淚語此生切莫負詩書

蘅臯一晌轉風輪何處三生證夙因帳裏餘香難辟惡
鏡中留影尚含顰問天底事情偏薄終日疑君死未真
閒向玉臺吟兩製爭教奉倩不傷神

金粟前生舊結緣髻螺高綰上諸天却看印雪鴻無定
應笑抽絲繭自纏總使佳人難再得幾曾皓月不重圓
俸錢他日堪營奠翻恐遺簪墮冷煙

同孫豹人鄧孝威汪叔定李艾山宗子發陸懸圃
李大邨諸公酌第五泉戲題長句

竹西名勝甲江滸祇怪漕渠同烏鹵何來此并有此泉
橫櫺百丈牽石虎傳聞蜀僧失一盂尋向此中得撈取
至今斷碣留佳話銀牀剝蝕蒼苔古我來正值炎歊時
舌乾吻燥良勞苦老僧爲客烹龍團椀面清香浮細乳
漱罷猶餘齒頰涼中冷惠山何足數何物陸生強解事
隨意低昂標第五嗚呼肉眼從來無定評獨汲軍持淚

如雨

與蕉飲話舊

虹橋風雨夜論文落落江東此數人羅雀門庭珠履散

不知誰解報春申

金陵虹橋書院故制府
下公招予輩讀書處

共指青松誓歲寒翩翩文酒罄交歡却看戴笠乘車日

始信天涯知己難

南部笙歌駐彩雲高樓鑿火醉紅裙春風力盡蠻腰舞

楊柳淒淒笛裏聞

我已三年廢蓼莪離鸞別鵠奈君何天心也學時人薄

只爲黃楊閏歲多

隴西太夫人生日

高秋送肅爽金風動桂枝前軒競竹肉後堂羅金卮上
客咽車蓋前進壽母詞攜撫南陽菊飮餽東海芝張箴
與班誠點窳何陸離賤子擬獻頌雷同恐見唾捧觴徒
默默啣恩顧沾衣舉頭指圓月當秋愈光輝

伊昔賦于歸盛年在三五桓桓給諫公上殿爭如虎陋
彼王章妻懇觸要人怒用成謬誇名聞風栗生股從拚
緯不恤肯信天難補海桑彈指更初心不堪拊借隱餉
田間賢聲聞齊魯黃鵠雖離群此心共千古

吾師伏藁由荏冉三載過東山足嘯傲奈彼蒼生何日

子有老母形影相婆娑太母蹶然笑此意良足多我家
盛簪笏汗青名未磨矧當強仕歲歲月堪蹉跎我髮猶
未白我顏猶如醜慎毋以我故偃蹇困巖薶
出處商更難伯曰兒在側象服非我庸斑衣舞亦得况
有獻芹人崢嶸繞雙膝回頭瞻予季去去無相憶吾師
愴無言百端橫胷臆還念家庭樂詎以簪組易殷勤捧
流霞歡喜動顏色猗與孝與慈千秋傳令則

古渡橋同俞蒼文賦

西風禾黍揚州路煙草茫茫沒古渡橋頭行客劇傷心
寒蝶衰荷共遲暮石馬空埋宋帝宮玉魚難覓隋皇墓

老僧抵掌訴繁華清磬一聲醒晝寤

橋北有庵是時密雨放生

飄散絲昏鴉列隊蒸黑霧繞堤楊柳故垂垂泣向荒郊
盼鑿輅誰家亭館枕波平紅蓼參差竹枝互酒帘捲盡
畫樓空獨占秋聲在高樹呼羣剝啄快幽尋長鬚拒客
聲何怒興盡歸來擬賦詩景好翻愁難得句

得傅駕飛函問

初夏鬢分首河梁君愴神如何三月別便作九原人病
已秋來減詩猶壁上新料應吳楚隔消息未全真

席上賦雨中植桂兼送蒼文北上

細雨渾無賴乘秋礙月圓嫦娥忽相失丹桂故依然落

子當階靜安根倚石偏栽培知有意折取任來年
昨歲花開候尊前數子俱同心各異地分手便長途漫
咏留人句翻成送別圖無爲兒女態倚醉且歌呼

雨夜階文客真州戲成二絕句

江城秋半水雲深獨倚篷窗擁鼻吟知爾不曾爲客慣
况堪夜雨滴愁心

晚來風景一憑欄畫本詩材得大觀夜半孤余人不寐
始知生世別離難

師儉堂同汪悔齋許師六兩編修劉彥度大行李
晝公給事宴集分賦月

天上清虛府傳聞是月宮玉盤高瀉露桂葉靜無風魚
腦緣誰滅蛾眉訝許工乍看疑破鏡轉盼失縣弓三五
乘良夜纖阿御碧空一輪圓影散千里素光同顧兔截
襪見嫦娥笑語通波搖金破碎繩轉玉璫瓏未許微雲
滓常疑匹練蒙池臺曾築漢斤鑿記游嵩庾亮樓頭翫
班姬扇底逢見名符好寢占姓想餘雄只有卿堪竝寧
云姊太崇色因帶雨白光欲奪鐙紅牛渚歌方徹霓裳
曲未終啣盃欣不夜街鼓莫匆匆

雨懷 選七首

憶昔辭家日啣盃叙所知蒼茫傾別緒慷慨話歸期露

苦蟲吟澀風高木落悲居人應錯怪底事滯天涯
吳楚家鄉遠秋風夜夜心話多難寄雁夢斷怯聞碓井
逕牛羊夕雷塘禾黍陰算來亡國恨未抵別離深
髣髴親闈近遺容忍淚看無情連夜雨不念九京寒多
難呼天遠長貧負土難何時依總帳慟哭薦盤餐
自汝爲吾婦何曾形影隨詩成煩却寄酒失遠相規人
學陽城笑家描京兆眉辛勤井臼側多病獨憐伊
顧我今爲客詩書不庇身那能期爾輩還復效前人嗜
好隨年長啼號畏母嗔遙知攜幼弟掩泣望征塵
夢到曹溪畔蘭橈泛九秋僧寮聽說法妓館賭藏鉤惜

別添華髮裁書話舊游如何十年事一夕上眉頭
競道江都好如予不謂然山堪樓堞亞水借斗升偏峯
柳秋來景葦鱸雨後天驚心塞上雁猶及此時旋

飲李久于齋同丁柯亭賦

愛此李邕宅坐來塵慮清疎簾圍燭影高樹得秋聲往
事停杯憶虛檐散髮行揚州今夜月信有二分

陸爾伸招同宗鶴問黃仙裳史蔚奇王景州歙州

李喈文厚文西園燕集

步出城北門晚鷓噪高柳行行至西園良朋欣執手是
時秋氣深佳辰逼重九風高木葉疎蜀岡排戶牖層巖

試登眺一郡誇奄有壺觴取次瞰水陸窮滌藪雜坐忘
主賓長筵列奇偶誰當啖牛心且復持蟹拇涼露已垂
珠新月正懸鈕散髮濯清泉歷歷見星斗西風戰敗荷
蕭瑟入襟肘底事賦無衣不如飲美酒

扇頭見唐嵩少壬戌九日讌集作有感次韻

憶昨登高候扁舟載酒來長天征雁急細雨暮蛩哀良
會不再得黃花空復開舊游疑隔世真負玉交盃

別揚州

生小慕揚州繁華甲南部今歲整奚囊蒼茫恣懷占興
衰覩歷歷悲歌浩難阻佳句宛目前抽毫輒齟齬旣歎
詩腸枯旋令游情懦所以兩月來穴伏同憂癩負此名
勝區愧悔孰可語詞客且莫笑俟我重來補

瓜洲夜泊

凌晨戒長年爾行毋徭徇刻期當渡江逡巡不爾宥怪
哉石尤風打頭故儻憊迤邐至瓜洲夜色正昏貿賈舶
啣尾停相顧驚急溜崩騰怒馬犇剽悍强弩筵激宕發
奇響客心共攢鬪猛聞金焦鐘已是三更候

舟宿丹陽侵曉遇雨

朝發揚子江夜泊丹陽道已嗟逆風遲更奈落日早濁
酒酤新豐三杯何草草寒衾耿無寐打更聞宿鳥驟雨

廕然至怒濤挾灝熒佐以雷電威川程人跡掃孤征戒
不前坐失東方曉我歸豈得已天公故相惱

毘陵道中雷雨覆舟口號

巾卷依然去日裝輕颿那敵北風狂從今自負驚人句
曾辱雷霆下取將
從判六尺飽蛟螭乞得餘生轉自疑幸是風波曾久歷
不須惆悵怨篙師

過當恕軒憶王惟夏先生

舊時文酒地雙屐費幽尋霜老庭中樹風鳴石上琴半
生支傲骨一死葬雄心徙倚斜陽晚愁雲鎖夕岑

負薪終刺史賣酒亦乘傳往者多奇遇先生胡不然青
燐依岸草白骨腐墟煙總使歸華表滄桑已變遷

贈周丹壑

江頭把酒一高歌五十韶華草草過翁子功名今已晚
達夫詩卷向來多閒窻雨霽山如沐平野霜空樹欲醜
便向此中得佳趣浮雲富貴奈君何

鏡臣齋中與薛趾厚夜話有感

擬印通明上尺書此中何處問盈虛桂因礙月應須斫
蘭不當門底用鋤蒼狗白衣忙過眼丹山綠水好容予
憑君莫訴當年事憂患從來識字初

調鏡臣

扁舟載酒過橫塘
蘭芷春回粉汗香
聞道輕盈剛十五
可能真個嫁王昌

有贈

一尺腰肢柳曳風
輕盈合在掌擎中
近來姊妹能相妬
莫把蛾眉畫許工

述德抒情二十四韻呈郡守朱公

東閣延賓日南州掛榻時
鄒枚梁苑聚應阮鄴宮隨
自顧形容陋虛慚姓氏知
徵書何迫促行李笑支離
率爾懷綾刺居然覲紫芝
官閑容問字政暇好論詩
吾道尊

模楷人文得總持
坐風春靄靄立雪夜遲遲
取次陳鱸膾殷勤
酒卮時陪山簡醉
偶賭謝公棋
樂令能清耳匡衡最解頤
捉松霏玉屑刮目試金篋
情重惟增愧恩深轉自疑
機杼分燭照忝谷聽筒吹
萬里思騫翮三年獨守雌
蹉跎違杖履感激但漣沍
掩卷王褒痛當秋宋玉悲
翳桑窮趙市拾菊效湘纍
漫擬潛夫論親裁棄婦詞
愁牽江總宅寢繞季長帷
幸矣三江畔翩然五馬馳
羲娥原竝照雨露豈無私
價重驪黃選春榮桃李姿
微生欣有托戴德矢捐糜

同蔡龍文曹礎航徐啓遠莊祉如陸原質詒穀金

漢威張岷山集雙柑書屋卽席賦

海濱避跡似爰居朋舊相逢興未疎浩蕩共傾婪尾酒

顛狂時看擘窠書不嫌徵索尋常有且喜頭銜次第除

龍文觴政有白衣至釀王諸位次凡升降到任納稅等項各輸數籌名曰醉鄉深處珍重醉鄉風

景好多情銅箭故徐徐時短至後一日

責犬

晉公牽汝與燕會朱生抱汝當卧被我無其癖亦中之

喜聽信信警酣睡吠雲嚙雪每呈能青曹白望時錫名

雖無麀麋果汝腹三器分飼豈汝憎亦不望汝夜攔孫

峻袷亦不望汝遠寄陸機札但期門戶嚴職司戴冠畜

火任爾爲可憐主人長貧賤爾便翻身去里閭周譽宋

淖自成羣鳥喙哇喋那可聞爾今搖尾歸故宅似悔辜

儂豢養力爾去何故來何因還恐包藏禍難測呼童持

棒叱門外去去毋汚我敝蓋

歲寒集同張雲先衛公陸紫湄朱石濤舍姪亮武

分賦冰

歲晚凝陰固寒流咽不通藏時當北陸解處待東風備

暑凌人重登盤祀典隆玉壺心共映海鏡照還同入貢

千年異占時五寸豐成紋疑大樹欲琢失良工騎列淖

沱暗蠶抽員嶠紅楊家山繞席諸葛鑑懸空只可供廉

吏寧堪語夏蟲狐聽偏寂寂魚躍每冲冲到處迎風合
何時向日烘夜深增料峭急仗酒兵攻

久不得敬直音問詩以懷之

頻年歌哭與君同別後驚看歲又終豈忍視如秦越瘠
却教信隔馬牛風英雄且復塵埃裏戈又由來談笑中
肝膽平生向人盡只今誰肯慰途窮

大冶相國京邸垂訊奉寄四首

秘禁栖鷓鷯仙班耀鳳麟黑頭瞻氣象赤棒著威神商
鼎和羹重周璜協夢新如何霄漢上肯憶倦遊人
南天曾秉鉞延攬到吳蒙敢竊無雙譽真成得五功絳

紗遲夜月綠酒醉春風三尺堦前雪猶疑侍維東

聞道平津閣繽紛桃李行吹噓成俊彥吐握遂賢良鵬

展垂天翼苞脚照地光自憐飛動意蕭瑟滯江鄉

我鄉張起

占姜敬直程天石張長史諸子俱蒙恩遇

苦次餘殘骨衣裳見淚痕終宵嗟北斗經歲卧南邨見
說空懸榻何時得埽門匣中孤劍在留報信陵恩

寄蔣京少

醉脫貂裘當酒錢遶牀大叫夜忘眠寒梅依舊飛晴雪
獨立西風憶去年

歷徧艱危賸隻身麻衣重浥涕痕新古來不少鮮民痛

慘烈誰如我兩人京少與子先後俱遭兩艱

聞君燕市乍迴車又向荊州跨蹇驢南北經行一萬里

不知鷄骨定何如

我亦饑驅西復東天涯均是可憐蟲兩家世德垂青史

尊人慎齋先生與先子俱載通志鄂渚輸君俎豆崇京少為尊人崇祀漢陽名宦



